

SCRIPT OF MORNING GOJRI NEWS BULLETIN 31AUG 2026 1015HRS

مارنگ گوجری نیوز بولٹن 31 اگست 2026

یوہ آکاشوانی جموں ہے عبیدالرحمان تیں خبر سُنو۔

LG AMARNATH YATRA

لیفٹیننٹ گورنر منوج سنہا نے امرناتھ جی یاترا 2026 نانہ کامیابی نال مکمل کران ور افسراں تے دیگر شراکت داراں غی حوصلہ افزائی کی ہے۔ انہاں نے شرانین بورڈ سیول انتظامیہ فوج ، سی اے پی ایف جموں کشمیر پولیس، بی آر او ، طبعی ٹیمیں ، خدمات گزاراں تے رضاکاراں غی طرفوں سانجے طور ور کی گئی کوششاں نانہ سہراوتے اس کامیابی ور خوشی غو اظہار کیو۔ واضح رے کہ 57 دنن غی اس امرناتھ یاترا مانہ تقریباً 4 لکھ 80 ہزار عقیدت منداں نے امرناتھ گُفا ور حاضری دتی۔ اس دوران دس دن تک موسم سخت خراب وی رہیو لیکن 3 جولائی نانہ شروع ہوئی یاہ یاترا 28 اگست نانہ کامیابی نال مکمل ہوئی لیفٹیننٹ گورنر نے خاص طور ور ہر وقت دستیاب طبعی خدمات صفائی تے بروقت نگہداشت گو ذکر کرتا واں اس کامیابی نانہ ٹیم جموں کشمیر غی ایک بڑی کامیابی قرار دتو جہڑی جے ات کی سانجی خدمات تے مہمان نوازی غو ایک واضع نمونو ہے۔

PM MKB SANITATION

وزیر اعظم نریندر مودی نے گزشتہ روز اپنا، من غی بات پروگرام مانہ شری امرناتھ جی یاترا 2026 غے دوران صفائی تے کوڑا کرکٹ نانہ سائنسی طرز ور ٹھکانے لان وستے استعمال کیا گیا سائنسی ویسٹ منیجمنٹ ماڈل غو ذکر کیو۔ اس دوران کئی خاص جگہاں تیں علاوہ بُنیادی کیمپاں تے بال ٹال پہلگام رستاں ور تقریباً 8 ہزار صفائی سہولیات دستیاب رکھی گئی تھیں زمین ور صفر کوڑا کرکٹ مہم غے تحت 4 سو 14 عشاریہ 46 میٹرک ٹن کوڑا کرکٹ نانہ اکٹھاں کرغے سائنسی طرز ور تلف کیو گیو۔ اس قدم غے تحت کچرا نانہ الگ الگ کرن جمع کرن تے لیان لے جان وستے سائنسی طریقہ استعمال کیا گیا۔ اس دوران آئی ای سی مہم نے عقیدت منداں غے اندر ذمہ داری نال کچرا نانہ تلف کرن غی بیداری پیدا کی۔ انتظامیہ نے کہیو ہے کہ اس ماڈل نے صفائی ستھرائی تے عوامی صحت نانہ یقینی بناتاں واں نازک ہمالیائی ماحول گا تحفظ مانہ مدد فراہم کی ہے۔

Dy CM FLYOVER COLLAPSED

نائب وزیر اعلیٰ سریندر چودھری نے سامبہ مانہ جکھ تے جموں مانہ سدھڑا غو دورو کیو، جت زیر تعمیر ڈاک ایکس پریس فلائی اوور پُل گا ٹہہ جان نال گجھ افراد غی جان چلی گئی تھی تے دیگر کئی زخمی ہویا تھا۔ اس موقعہ ور موصوف نے صورتحال گو جائیزو لیو تے متعلقہ تمام اتھارٹیاں نانہ سکت ہدایت جاری کی کہ وے ذمے داری نال حفاظت نانہ یقینی بناویں۔ اس تیں علاوہ وزیر موصوف نے نوشہرہ مانہ مکرئی گراں غا باشنداں نال مُلاقات کی تے علاقہ غے اندر چل رہیا ترقیاتی کماں ور گل بات کی۔ اس موقعہ ور موصوف نے متعلقہ عوام نانہ یقین دہانی کرائی ہے کہ اُن گا خدشات غو باریکی نال جائیزو لیو جے گو تے تمام ضروری اقدامات کیا جئیں غا تانجے ترقیاتی کم مزید معیاری تے وقت رہتیں مکمل کیا جئیں۔

VENDOR PROG

جموں غے اندر بڑی برہمنان صنعتی تنظیم غا کانفرنس ہال مانہ 1 تے 2 ستمبر نانہ دو روزہ سی پی ایس ای سطح غو وینڈر ترقیاتی پروگرام 2026 منعقد ہو رہیو ہے۔ ایم ایس ایم ای ، ڈی ایف او جموں غی طرفوں منعقد کرایا جان آلا اس پروگرام گو مقصد بہت لوکی ، لوکی تے درمیانہ درجہ غی صنعتاں نانہ وینڈر ترقیات اندراج تے کاروبار وستے موقعہ فراہم کرتا ہیں اس دوران بڑی تنظیم جہڑی اس پروگرام مانہ شرکت کررہی ہیں اُن مانہ انڈین ، ائیل ، پاور گرڈ ، بی پی سی ایل، این ایچ اے آئی، این ایچ پی سی، بی ایس این ایل ، ایف سی آئی، جیم تے

دفاعی سطح ور سی آر پی ایف تے ایس ایس بی قابل ذکر ہیں۔ یوہ پروگرام لوکا تے درمیانہ سطح غا صنعت کاراں تے کاروباریاں نانہ براہ راست بڑی تنظیمیں نال ملاقات کرن غو موقعو فراہم کرے غو۔ جس نال کاروبار گا نوا موقعہ فراہم ویں گا تے مقامی صنعتاں نانہ قومی سپلائی چین نال جڑن گو موقعو فراہم وے گو۔

TAWI WONDERLAND

جموں مانہ توی ونڈر لینڈ پارک ایک متحرک ثقافتی مرکز مانہ اُس وقت تبدیل ہوگیو جد سینکڑاں خاندان ، نوجوان تے زائرین یوفوریا ثقافت نانہ منان خاطر ایک شام وستے اکٹھا ہویا ۔ جموں سمارٹ سٹی لمٹیڈ غی طرفوں منعقد کرایو گیو۔ یوہ پروگرام 3 گھنٹہ توڑی جاری رہیو۔ جس مانہ موسیقی رقص تے رنگارنگ روایتی ثقافت غا نمونہ دیکھیا گیا اس پروگرام مانہ گنیش وندھنا دوگری تے پنجابی گانان روایتی ڈوگری تے کشمیری ناچ تے پنجابی ناچ دیکھی گئی اس پروگرام مانہ مقامی کلاکاراں نانہ اپنو ہنر پیش کرن غو موقعو ملیو۔ اس پروگرام مانہ پولیس گا ڈپٹی انسپکٹر جنرل شریدھر پاتل تے جموں میونسپل کارپوریشن گا کمشنر تے جموں سمارٹ سٹی لمٹیڈ گا سی ای او ڈاکٹر دیوانش یادو وی موجود رہیا۔

IFFJK DEADLINE EXTENDED

فلم بنان آلاں وستے ایک خوش آئیندہ قدم چاتاواں آئی ایف ایف جے کے ایمرجنگ فلم میکر مقابلہ 2026 وستے شراکت داراں تے دیگر مانگاں غے پیش نظر اج وستے 1 دن غی تاریخی بدھائی گئی ہے۔ اس پروگرام مانہ شرکت کرن آلا فلم سازاں نانہ فلم غو وقت 20 منٹ تک دتو گیو ہے تانجے وے اپنی صلاحیتاں گو مظاہرو کرسکیں۔ واضع رہ کہ آئی ایف ایف جے کے 2026،7 ستمبر تیں 10 ستمبر توڑی سرینگر جموں تے گلبرگ مانہ منعقد وے غوسچی کہانیاں تے تخلیقی آوازاں آلا فلم سازاں نانہ اس پروگرام مانہ شرکت کرن تے اندراج مکمل کران غے نال فلم جمع کران گو کہیو گیو ہے۔

WEATHER

محکمہ موسمیات نے جموں کشمیر غے اندر آئیندہ گجھ دناں وستے موسم گرم رہن غی پیش گوئی کی ہے۔ اکاشواں جموں گا نمائندہ نے خبر دتی ہے کہ اج تے کل وستے کئی جگہاں ور ہلکی بارش غی امید ہے تے 2 ستمبر تیں 7 ستمبر توڑی گجھ جگہاں ور ہلکی بارش ہوسکے۔
